

Վարչական իրավախախտման գործով զանգատն առանց բավարարման, իսկ որոշումն անփոփոխ թողնելու մասին

14.05.2018թ.

ք.Երևան

Ճանապարհային ոստիկանության պետ, ոստիկանության գնդապետ Եզոր
Կարապետյանս, վերանայելով Աշոտ Հարությունյանի դիմումի շուրջ ստեղծված նյութերը

Պ Ա Ր Զ Ե Ց Ի

2018թ. ապրիլի 13-ին Շիրակի մարզի Հառիճ գյուղի 41 փողոցի 2 տան բնակիչ Ա.Հարությունյանը դիմում է հասցեագրել այն մասին, որ ստացել է վարչական տույժ նշանակելու մասին ԱԴ թիվ 548812 որոշումը, որի հետ համաձայն չէ, քանի որ Երևան քաղաքում իր մեքենայի դիմապակին բազմիցս ստուգվել է տեսուչների կողմից և ոչ մի խնդիր չի առաջացել: Դիմումատուն խնդրել է տուգանքը վերանայել և կրկին ստուգել մեքենայի դիմապակին:

Դիմումի ուսումնասիրությամբ պարզվել է, որ 2018թ. ապրիլի 13-ին ժամը 13.05-ին Երևան քաղաքի Բագրատունյաց փողոցում Ա.Հարությունյանի կողմից վարած «Վագ» մակնիշի 34 CM 181 հաշվառման համարանիշի ավտոմոբիլը կանգնեցվել է ճանապարհային ոստիկանության ճՊԾ 1-ին սպայական գումարտակի 5-րդ սպայական դասակի ավագ տեսուչ, ոստիկանության մայոր Լ.Առաքելյանի և նույն դասակի տեսուչ, ոստիկանության մայոր Կ.Գևորգյանի կողմից ճեԿ-ի խախտման համար, այն է՝ վարորդն ավտոմոբիլը վարել է առջևի հողմապակու լուսաթափանցելիության չափի խախտումով, ինչի համար կազմվել է վարչական իրավախախտման վերաբերյալ արձանագրություն և, համաձայն ՀՀ ՎԻՎ օրենսգրքի 123-րդ հոդվածի 4-րդ մասի, կայացվել է ԱԴ 548812 որոշումը՝ 30.000 դրամ տուգանելու մասին:

Ըստ ծառայողների գրավոր բացատրությունների՝ 2018թ. ապրիլի 13-ին Երևան քաղաքի Բագրատունյաց փողոցում կանգնեցրել են «Վագ» մակնիշի 34 CM 181 հաշվառման համարանիշի ավտոմոբիլը, որի առջևի հողմապակին ակնհայտ մուգ է եղել և «PRO-100» սարքի միջոցով լուսաթափանցելիությունը ստուգելուց հետո պարզվել է, որ վարորդը ավտոմոբիլը վարել է առջևի հողմապակու լուսաթափանցելիության չափի խախտումով, որը կազմել 44.2%: Արձանագրությունը կազմելուց հետո վարորդը ծանոթացել է արձանագրությանը, ստորագրել, իսկ որոշում կայացնելուց հետո ստորագրել և ստացել է որոշման իր օրինակը: Ծառայողները հայտնել են նաև, որ վարորդը իրենց չի հայտնել, որ նախկինում ստուգվել է հողմապակու լուսաթափանցելիությունը և ոչ մի խնդիր չի առաջացել:

2018թ. մայիսի 10-ին ծանուցագրի միջոցով, քաղ. Ա.Հարությունյանը ճանապարհային ոստիկանության պետին հասցեագրած դիմումի քննարկմանը մասնակցելու նպատակով՝ հրավիրվել է ճանապարհային ոստիկանության ճՊԾ բաժին, սակայն չի ներկայացել:

Վարչական իրավախախտումների վերաբերյալ ՀՀ օրենսգրքի 123-րդ հոդվածի 4-րդ մասի համաձայն՝ ապակիների լուսաթափանցելիության չափի խախտմամբ կամ առջևի հողմապակին թաղանթապատված վիճակում կամ կարգի խախտմամբ վարագործապատված տրանսպորտային միջոցները վարելն առաջացնում է տուգանքի նշանակում՝ սահմանված նվազագույն աշխատավարձի երեսնապատիկի չափով:

Նույն հոդվածի 6-րդ մասի համաձայն՝ սույն հոդվածի 1-ին կամ 4-րդ մասերով նախատեսված իրավախախտում հայտնաբերելու դեպքում լիազորված մարմինը (պաշտոնատար անձը) այդ իրավախախտումը կատարած անձին իրազեկում է իրավախախտման հատկանիշները վերացնելու դեպքում վարչական պատասխանատվության չենթարկվելու հնարավորության մասին: Անձը վարչական

պատասխանատվության չի ենթարկվում, եթե իրազեկումից անմիջապես հետո սկսում է իրականացնել վարչական իրավախախտման հատկանիշներն անմիջականորեն վերացնելուն ուղղված գործողություններ: Այդ դեպքում լիազորված մարմինը (պաշտոնատար անձը) վարչական իրավախախտման վերաբերյալ արձանագրություն չի կազմում:

Նույն հոդվածի 7-րդ մասի համաձայն՝ եթե, սույն հոդվածի 6-րդ մասին համապատասխան, վարչական իրավախախտումը հայտնաբերելուց անմիջապես հետո այդ իրավախախտման հատկանիշները վերացնել հնարավոր չէ, ապա լիազորված մարմինը (պաշտոնատար անձը) կազմում է վարչական իրավախախտման վերաբերյալ արձանագրություն և կայացնում վարչական պատասխանատվության ենթարկելու մասին որոշում:

Նույն հոդվածի 8-րդ մասի համաձայն՝ եթե սույն հոդվածի 7-րդ մասում նշված դեպքում վարչական իրավախախտում կատարած անձը լիազորված մարմնի (պաշտոնատար անձի) կողմից իրավախախտումը հայտնաբերելու պահից 24 ժամվա ընթացքում վերացնում է իրավախախտման հատկանիշները, ապա նա ազատվում է նշանակված տույժը կատարելու պարտականությունից, եթե այդ մասին նույն ժամանակահատվածում լիազորված մարմնին (պաշտոնատար անձին) ներկայացնում է համապատասխան ապացույց: Այդ մասին կազմվում է համապատասխան արձանագրություն, որի պատճենը տրվում է իրավախախտումը կատարած անձին:

Այսպիսով, կատարված ուսումնասիրություններով պարզվել է, որ Ա.Հարությունյանի արարքում առկա է Վարչական իրավախախտումների վերաբերյալ ՀՀ օրենսգրքի 123 հոդվածի 4-րդ մասով նախատեսված դեպքը, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով,

Ո Ր Ո Շ Ե Ց Ի՝

1. Ա.Հարությունյանի դիմումը թողնել առանց բավարարման, իսկ ճանապարհային ոստիկանության ՃՊԾ 1-ին սպայական գումարտակի 5-րդ սպայական դասակի տեսուչ, ոստիկանության մայոր Կ.Գևորգյանի կազմած վարչական իրավախախտման արձանագրության հիման վրա կայացրած 2018թ. ապրիլի 13-ի ԱԴ թիվ 548812 որոշումը՝ Աշոտ Հարությունյանին երեսուն հազար դրամ տուգանելու մասին՝ անփոփոխ:

2. Սույն որոշման օրինակներն ուղարկել ճանապարհային ոստիկանության ՎԳ բաժանմունք և դիմումատուին:

3. Սույն որոշումը կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:



Ե.Վարապետյան